



## Malaysia, Singapura bincang teliti isu tambakan Pulau Batu Puteh

Oleh Mohamed Farid Noh - Januari 30, 2023 @ 8:54pm  
farid\_noh@bh.com.my

SINGAPURA: Malaysia dan Singapura bersetuju mengadakan rundingan lebih terperinci terhadap langkah republik itu menambak kawasan sekitar Batu Puteh dalam masa terdekat, kata Datuk Seri Anwar Ibrahim.

Perdana Menteri berkata, beliau membangkitkan perkara itu pada pertemuan bersama Perdana Menteri Singapura, Lee Hsien Loong pada lawatan rasminya hari ini.

Katanya, keputusan Mahkamah Keadilan Antarabangsa (ICJ) sudah menetapkan Batu Puteh adalah milik Singapura dan penambakan (di Batu Puteh) oleh Singapura dilakukan mereka mengikut keputusan perundangan yang sudah ditetapkan.

"Namun Malaysia meminta Singapura teliti semula kerana setiap tambakan memberi kesan sampingan kepada iklim, persekitaran dan persempadanan negara kita.

"Jadi saya dapat persetujuan Perdana Menteri Singapura supaya mendengar hujah kita dalam rundingan lanjut yang akan diadakan dalam masa terdekat.

"Tetapi penafsiran, penakrifan dan interpretasi serta persetujuan mengenai kerja penambakan itu sedang dibincang dan diperincikan, sejauh mana penambakan boleh dilakukan.

"Namun kita pastikan rundingan akan dilakukan secara baik antara dua negara sahabat," katanya pada sidang media di Suruhanjaya Tinggi Malaysia di Singapura, di sini, hari ini.

Terdahulu, Perdana Menteri menghadiri Majlis Ramah Mesra bersama rakyat Malaysia di Suruhanjaya Tinggi Malaysia di Singapura, selama kira-kira satu jam.

Hadir sama, isteri Perdana Menteri, Datuk Seri Dr Wan Azizah Wan Ismail.

Sementara itu, Anwar berkata, Malaysia menyatakan kepada Singapura mengenai negara ini yang tidak bersetuju dengan tindakan mantan Perdana Menteri, Tun Dr Mahathir Mohamad tidak bersetuju membawa kes ini untuk rayuan di ICJ.

"Bagaimanapun ICJ sudah membuat keputusan dan kita sebagai negara berdaulat mesti menghormati penghakiman ICJ.

"Yang kita pertikaikan adalah langkah penambakan yang dilakukan Singapura itu.

"Namun Singapura setuju supaya perkara ini diteliti pasukan rundingan terutama hujah dan alasan yang kita kemukakan dari segi kerosakan persekitaran dan hal bersangkutan sempadan yang perlu dirundingkan secara teliti sebelum dimuktamadkan," katanya.

Menyentuh mengenai isu air, Perdana Menteri berkata, perbincangan akan diperincikan bagi memastikan bekalan air mencukupi kepada Johor dan Singapura dengan perkiraan baharu sekiranya dapat diperluaskan ke Pahang.

"Kita ucap terima kasih pada kesediaan Singapura membuka pintu rundingan yang akan memberi ruang kepada bekalan air cukup kepada Johor dan Singapura.

"Namun ia perlu dibincangkan dengan Kerajaan Pahang, Johor dan Kerajaan Persekutuan," katanya.

Mengenai lalu lintas ruang udara yang memasuki ruang udara Malaysia, Anwar berkata, kedua-dua negara bersepakat untuk menetapkan kawasan yang harus menjadi hak mutlak Malaysia.

"Di samping itu Singapura bersedia berbincang supaya laluan untuk Lapangan Terbang Antarabangsa Changi tidak diganggu sesiapa supaya dapat dimanfaatkan untuk laluan penerbangan republik itu.

"Berhubung kesesakan di Tambak Johor yang kritikal, kedua-dua negara bersetuju supaya ia dibaiki sementara kita perkenalkan sistem digital lebih canggih.

"Malaysia juga bersetuju memberi kemudahan tambahan pada hujung minggu dan waktu puncak bagi melancarkan perjalanan pekerja Malaysia masuk dan balik dengan kemudahan semaksimum mungkin oleh imigresen dan kastam," katanya.